

Pendapatan nelayan terjejas kerana bot tidak dapat masuk jeti pendaratan ikan

Sengsara kuala sungai cetek

Oleh NORLIDA AKMAR IDROS
norlida.idros@kosmo.com.my

JITRA – Lebih 100 nelayan pantai di Kuala Jerlun di sini mendakwa terpaksa menanggung kerugian setiap kali bot mereka tidak dapat masuk ke jeti pendaratan ikan ekoran masalah kuala sungai yang cetek.

Rata-rata nelayan memberitahu, mereka terpaksa menunggu sehingga air pasang untuk menghampiri jeti menyebabkan hasil tangkapan sering lewat dijual di pasar pagi.

Seorang nelayan, Zuraimi Zakaria, 38, berkata, masalah kuala sungai yang cetek hingga ke paras buku lali itu berlaku sejak beberapa tahun lalu namun ia semakin kritikal sejak kebelakangan ini.

“Meskipun kawasan yang cetek adalah sepanjang 500 meter namun ia menjadi masalah besar buat nelayan di sini untuk berulang-alik ke jeti,” katanya ketika ditemui di sini semalam.

Kata Zuraimi, dia pernah menunggu se-

hingga pukul 11.30 pagi semata-mata untuk melabuhkan bot di jeti dan terpaksa menanggung kerugian pada hari tersebut.

“Nelayan sepatutnya sudah sampai ke jeti pendaratan ikan seawal pukul 8.30 pagi kerana pada waktu itu orang ramai sudah menunggu. Jika kami tiba selepas pukul 11 pagi, semua hasil terpaksa dijual kepada peraih dengan harga yang jauh lebih murah,” katanya.

Seorang lagi nelayan, Mohd. Azhar Osman, 30, pula memberitahu, selain berdepan hasil pendapatan yang berkurangan setiap hari, nelayan juga terpaksa menanggung kerugian ekoran kerosakan enjin dan kipa bot yang tersangkut pada dasar sungai.

“Jika rosak kerana tersangkut, nelayan terpaksa membeli enjin baharu yang mencecah RM3,000. Mana mungkin kami dapat menggantikannya dalam tempoh singkat jika ia berlaku,” katanya.

Sehubungan itu, beliau merayu pihak berwajib supaya mengambil langkah segera mendalamkan kawasan terbabit.



ZURAIMI (tengah) bersama dua nelayan menunjukkan kawasan kuala sungai yang cetek menyebabkan mereka sukar melabuhkan bot di jeti pendaratan ikan di Kuala Jerlun, Jitra, Kedah semalam.

Sementara itu, Pengerusi Jawatankuasa Pembangunan Wanita, Kebajikan Masyarakat, Pertanian dan Asas Tani dan Pembangunan Usahawan Kedah, Datuk Suraya

Yaacob berkata, kerajaan negeri akan mengenal pasti semua kuala sungai yang cetek di negeri itu bagi mendalamkan kawasan tersebut.